


醫說

醫說卷第四

勞瘵

五勞

夫人作勞傷於五臟五臟之氣因傷成病故謂之五勞肺勞之狀短氣而面腫不聞香臭肝勞之狀面目乾黑口苦精神不守恐畏不能獨卧目視不明心勞之狀忽忽喜忘大便難或時澇利口内生瘡脾勞之狀舌根苦直不得嚥唾腎勞之狀背難俛仰小便不利赤黃而有餘瀝囊



濕生瘡小腹裏急治法肝勞補心氣心勞補脾
氣脾勞補肺氣肺勞補腎氣腎勞補肝氣此療
子以益母也經曰聖人春夏養陽秋冬養陰以
補其根本肝心爲陽脾肺腎爲陰夫五臟實亦
成勞虛則補之實則瀉之

六極

六極者筋極主肝脉極主心肉極主脾氣極主
肺骨極主腎精極主臟腑筋極之狀令人數轉
筋十指甲皆痛苦倦不能久立脉極之狀忽

忽喜忘少顏色眉髮墮落肉極之狀飲食無味
不生肌肉皮膚枯槁氣極之狀正氣少邪氣多
氣不足多喘少言骨極之狀腰脊酸削齒痛手
足煩痛不欲行動精極之狀肉虛少氣喜忘鬢
衰落然謂之極者病重於勞也治法與治勞同

七傷

七傷者一曰大怒逆氣傷肝二曰憂愁思慮傷
心三曰飲食大飽傷脾四曰形寒飲冷傷肺五
曰久坐濕地傷腎六曰風雨寒濕傷形七曰大

怒恐懼傷志肝傷則少血目暗心傷則苦驚喜
忘脾傷則面黃善卧肺傷則短氣咳嗽腎傷則
短氣腰痛厥逆下冷形傷則皮膚枯槁志傷則
恍惚不樂治法與五勞六極同

虛勞

男子平人脉大爲勞極虛亦爲勞男子勞之爲
病其脉浮大手足煩春夏極秋冬差陰寒精自
出瘦削不能行寸口脉浮遲浮則爲虛遲則爲
勞虛則衛氣不足浮則榮氣竭脉直者遲逆虛

也脉澀無陽是腎少寸關澀無血氣逆冷是大
虛脉浮微緩而大者也勞也脉微濡相搏爲五
勞微弱相搏虛損爲七傷

冷勞

冷勞之人氣血枯竭表裏俱虛陰陽不和精氣
散失則内生寒冷也皆由臟腑久虛積冷之氣
遂令宿食不消心腹積聚臍腹疼痛面色痿黃
口舌生瘡大腸泄痢手足無力骨節酸疼久而
不痊轉加羸瘦故曰冷勞

以上雞
峯方

勞疰

勞動作也郭逢原曰凡人暫爾疲倦通謂之勞而今人以勞為惡疾而惡聞之親戚朋友共為隱諱見其疾狀莫敢呼之殊不知勞之為病初起於動作不能節謹至於疲倦且傷不已漸成大疾凡言虛勞者五勞是也六極七傷為類蓋蒙莊所謂精太用則竭神太勞則弊者治法不過補養五臟滋益氣血使之強盛則其疾自去又有傳尸勞者則非此類蓋緣尸疰及挾邪精

鬼氣而成者也經曰人有三虛逢年之衰遇月
之空失時之和乍感生死之氣忽犯鬼物之精
大槩寒熱淋露沉沉默不的知其所苦而無
處不惡積月累年漸就委頓既死之後又復傳
症他人者是也茲又須用通神明去惡氣諸藥
以治之經曰草木咸得其性鬼神無所遁情剗
射剗犀驅曳邪惡飛丹煉石引納清和疑其爲
此疾而設

同上

傳勞

葛洪云鬼症者是五尸之一症又挾諸鬼邪爲害其病變動乃有三十六種至九十九種大略使人寒熱淋瀝沉沉默默不知所苦無處不惡累年積月漸就沉滯以至於死傳與傍人乃至滅門覺如是候者急治獺肝一具陰乾杵末服方寸匕日三未知再作肘後云此方神良宣和間天慶觀一法師行考召極精嚴時一婦人投狀述患人有祟所附須臾召至附語云非我爲禍別是一鬼亦因病人命衰爲祟爾渠今已

成形在患人肺中爲蟲食其肺系故令吐血聲
嘶師掠之此蟲還有畏忌否父而無語再掠之
良父云容某說惟畏獺爪屑爲末以酒服之則
去矣患家如其言而得愈此予目所見也究其
患亦相似獺爪者殆獺肝之類歟

本事方

遇道人治傳勞方

袁州寄居武節郎李應本相州法司嘗以吏役
事韓似夫樞密兵火後忽於宜春見之云從岳
侯軍得官今閑居於此從容問其家事潸然淚

下曰某先有男女三人長子因議買宅入空無人所居之室忽覺心動背寒凜凜遂成勞瘵之疾垂殆傳於次次室女也長子既死女病尋亟繼又傳於第三子證候一同應大恐即禱於城隍神每日設麵飯以齋雲水冀遇異人且許謝錢三十萬數日因往市中開元寺前有一人衣俗士服自稱貧道踵足而呼曰團練聞宅上苦傳尸勞貧道有一藥方奉傳同入寺中問其姓名不荅口授云云應即取筆書之道人言欲過

湖南應留之飯云已喫飯了欲贈之錢云自有盤纏臨行又言此藥以天靈蓋虎糞內骨為主切須子細尋覓青蛇腦如無亦可服藥前一日須盛享城隍神求為陰助應曰既求之於神何必用藥道人曰不然即揖別西去應以其事頗異敬如其言治藥既成設五神位具飲饌十品如待貴客以享城隍又別列酒食以犒飲陰兵仍於其家設使者一位於病榻之前服藥食頃臟腑大下得蟲七枚色如紅燠肉而腹白長約

一吋闊七八分前銳後方腹下近前有口身之
四周有足若魚骨細如針尖而曲已死試取火
焚之以鐵火筋劄刺不能入病勢頓減後又服
一劑得小蟲四枚自此遂安今已十年肌體悅
澤不復有疾道人後竟不來其藥用天靈蓋三
錢酥炙黃色爲末秤虎糞內骨一錢人骨爲上
獸骨次之殺虎大腸內取者亦可用同青蛇腦
小豆許或蓋豆許同酥塗炙色轉爲度無蛇腦
只酥炙亦得鼈甲極大者醋炙黃色爲末秤一

兩九肋者尤妙安息香半兩桃仁一分去皮尖
研以上爲末絹篩過檳榔一分別爲細末麝香
一錢別研青蒿取近梢三四寸細剉六兩鼓三
百粒葱根二十一箇拍破東引桃柳李桑枝各
七莖麤如筋頭大各長七寸細剉楓葉二十一
片如無亦得童子小便半升右先將青蒿桃柳
李桑枝楓葉葱鼓以官省升量水三升煎至半
升許去滓入安息香天靈蓋虎糞內骨鱉甲桃
仁與童子小便同煎取汁去滓有四五合將檳

椰麝香同研均調作一服早晨溫服以被蓋覆
出汗恐汗內有細蟲以帛子拭之即焚此帛相
次須瀉必有蟲下如未死以大火焚之並棄長
流水內所用藥切不得令病人知日後亦然十
來日後氣體復圓再進一服依前焚棄至無蟲
而止此藥如病者未亟可以取安如已亟俟其
垂死則令下次已傳染者服之先病者雖不可
救後來斷不傳染

出百一選方韓樞
密孫廬帥亞卿傳

勞傷瘵疾

男子勞傷而得疾瘵漸見瘦瘠用童子小便二
盞無灰酒一盞以新甕瓶貯之全猪腰一對在
內密封泥日晚以慢火養熟至中夜止五更初
更以火溫之發瓶飲酒食腰子病篤者只一月
效平日瘦怯者亦可服此藥蓋以血養血全勝
金石草木之藥也

瑣碎錄

勞復

故督郵頓子獻得病已差詣華佗視脉曰尚虛
未復復勿為勞事御內即死臨死當吐舌數寸

其妻聞其病除從百里外省之止宿交接中間

三日發病一如佗言

三國志

鬼症

韶州南七十里曰古田有富家婦人陳氏抱異疾常日無他苦每遇微風吹拂則股間一點竒痒爬搔不停手已而舉體皆然逮於發厥凡三日醒及坐有聲如效其身乍前乍後若搖兀之狀率以百數甫少定又經日始困卧不知人累夕愈至不敢出戶更十醫弗效醫劉大用視之

曰吾得其證矣先與藥一服取數珠一串來病
家莫知何用也當婦人搖兀時記其疏數之節
已覺微減然後云是名鬼症因入神廟看為邪
所憑致精采蕩越法當用死人枕煎湯飲之既
飲大瀉數行宿痾脫然大用云枕用畢當送還
元處如遲留使人顛狂蓋但借其氣爾

類編

療疾

越州鏡湖邵長者女十八染療疾累年刺灸無
不求治醫亦不效有漁人趙十煮鰻羹與食食

覺內熱之病皆無矣今醫家所用鰻煎乃此意

尸症

飛尸者遊走皮膚穿臟腑每發刺痛變作無常
遁尸者附骨入肉攻鑿血脈每發不可得近見
尸喪聞哀哭便發風尸者淫濯四肢不知痛之
所在每發昏沉得風雪便作沉尸者纏骨結臟
衝心脅每發絞切遇寒冷便作注尸者舉身沉
重精神錯雜常覺昏廢每節氣致變輒成大惡
皆宜用忍冬葉數斛煮取濃汁稠煎之服如雞

子大一枚日三太一神精丹蘇合香元治此病

第一

本事方

虛勞用藥

凡虛勞之疾皆緣情慾過度榮衛勞傷致百脉
空虚五臟衰損邪氣乘襲致生百疾聖人必假
藥石以資氣血密腠理以禦諸邪肌肉之虛猶
如體之輕虛如馬勃通草蒲梢燈心之屬是也
非滋潤粘膩之物以養之不能實也故前古方
中鹿角膠阿膠牛乳鹿髓羊肉飴糖酥酪杏仁

煎酒蜜人參當歸地黃門冬之類者蓋出此意
本草云補可去弱羊肉人參之屬是也所謂虛
勞者因勞役過甚而致虛損故謂之虛勞今人
才見虛弱疾證悉用燥熱之藥如伏火金石附
子薑桂之類致五臟焦枯血氣乾涸而致危困
皆因此也如虛而兼冷者止可於諸虛勞方中
加諸溫熱藥爲助可也如此即不失古人之意

醫餘

鰻治勞疾

有人多得勞疾相因染死者數人取病者於棺中釘之棄於水永絕傳染之患流之金山有人異之引岸開視見一女子猶活因取置漁舍多得鰻鱧魚食之病愈遂為漁人之妻

稽神錄

虛勞服藥

養生必用方論虛勞不得用涼藥如柴胡鼈甲青蒿麥門冬之類皆不用服唯服黃芪建中湯有十餘歲女子因發熱咳嗽喘急小便少後來成腫疾用利水藥得愈然虛羸之甚遂用黃芪

建中湯日一服三十餘日遂愈蓋人稟受不同
虛勞小便白濁陰臟人服橘皮煎黃芪建中湯
獲愈者甚衆至於陽臟人不可用煖藥雖建中
湯不甚熱然有肉桂服之稍多亦反爲害要之
用藥亦量其所稟審其冷熱而不可一槩以建
中湯治虛勞也謹之

醫餘

骨蒸內熱

睦州楊寺丞有女事鄭迪功女有骨蒸內熱之
病時發外寒寒過內熱附骨蒸盛之時四肢微

瘦足趺腫者其病在五臟六腑之中衆醫不差
因遇處州吳醫看曰請爲治之只單用石膏散
服後體微涼如故其方出外臺祕要只用石膏
乳細十分似麵以新汲水和服方寸匕取身無

熱爲度

名醫錄

氣血虛發厥熱

氣虛則發厥血虛則發熱厥者手足冷也氣屬
陽陽虛則陰湊之則故厥血者陰也血虛則陽
湊之故發熱也氣虛發厥者當用溫藥血虛發

醫言卷第四
十一
熱者不宜用涼藥當用溫養氣血之藥以補之
宜養陰黃芪建中湯之類是也又有一種病實
熱者極而手足厥冷所謂熱深厥亦深此當用
涼藥須以脈別之也此最難辯差之毫釐則害
人性命戒之餘醫

人肉治羸疾

開元間明州人陳藏器撰本草拾遺云人肉治
羸疾自此間間相效割股

治羸瘠

仁和縣一吏早衰病瘠齒落不已從貨藥道人
得一單方只碾生硫黃爲細末實於豬臟中水
煮臟爛碾細宿蒸餅圓如桐子大隨意服之兩
月後飲啖倍常步履輕捷年過九十略無老態
執役如初因從邑宰入村醉食牛血遂洞下數
十行所泄如金水自是疴悴少日而死李巨源
得其事於臨安入內醫官管範嘗與王樞使言
之王云但聞豬肪脂能制硫黃茲用臟尤爲有
理亦合服之久當見效

治勞瘵吐血

翦草狀如茜草又如細辛婺台二州皆有之惟
婺可用其法每取一斤淨洗碎爲末入生蜜一
斤和成膏以陶器盛之不得犯鐵日一蒸一曝
至九日乃止治勞瘵吐血損肺及血妄行名曰
神傳膏令病人五更起面東坐不得語言用匙
抄藥如食粥然每服四匙良久呷稀粟米粥壓
之藥只冷服粟飲亦不可太熱或吐或下皆無
害如久病肺損咯血一服立愈

本事方

天靈蓋

謹按天靈蓋神農本經人部惟髮髮一物外餘
皆出後世醫家或禁術之流竒怪之論殊非仁
人之用心世稱孫思邈有大功於世以殺命治
命尚有陰責況於是也近數見醫家用以治傳
尸勞未有一效者信本經不用未爲害也殘忍
傷神又不急於取效苟有可易仁者宜盡心焉
苟不以是說爲然決爲庸人之所惑亂設云非
此不可是不得已則宜以年深塵泥所漬朽者

為良以其絕死氣也

本草

鼻衄吐血

鼻衄

饒州市民李七常苦鼻衄垂至危困醫授以方
取蘿蔔自然汁和無灰酒飲之則止醫云血隨
氣運轉氣有滯逆所以妄行蘿蔔最下氣而酒
導之是以一服效經五日復如前僅存喘息而
張思順以明州刊王氏單方刮人中白置新瓦
上火逼乾以溫湯調服即時血止至今十年不

作張監潤之江口鎮適延陵鎮官曾棠入府府
委至務同視海舶曾着白茸毛背子盛服濟潔
正對談之次血忽出如傾變所服爲紅色駭曰
素有此疾特不過點滴耳今猛烈可畏覺頭空
空然殆有性命之慮張曰君勿憂我當漸治一
藥移時而就持與之血亦止不復作人中白者
旋盆內積濂垢是也蓋秋石之類特不多用火
力治藥時勿使其人知恐其以穢濁不肯服此
方可謂神矣

又

予在汝州時因出驗尸有保正趙溫者不詣尸所問之即云衄血已數斗昏困欲絕予使人扶掖以來鼻血如簷溜平日所記治衄數方旋合藥治之血勢猛皆衝出予謂治血者莫如地黃試遣人四散尋生地黃得十餘斤不暇取汁因使生喫漸及三四斤又以其滓塞鼻須臾血定又癸未歲予姊病吐血有醫者教取生地黃自然汁煮服之日服數升三日而愈有一婢病經

血半年不通見釜中餘汁以爲棄去可惜輒飲
數盃尋即通利地黃治血其功如此地黃但用
新布拭淨搗汁勿用水洗

信效方

毆血咯血

台州獄吏憫一大囚將死頗照顧之囚感語之
吾七次犯死罪盡力抗諱苦遭訊考坐是肺皆
撐損至於毆血適得一藥每用其效如神荷君
庇拊之恩持此以報只白及一味米飲調爾其
後陵遲僧者剖其胷見肺間竅穴數十處皆白

及補填之色猶不變也洪貫之聞其說爲郢州長壽宰規之赴洋川任一卒忽苦咯血勢絕危貫之用此救之一日即止

癸志

山梔子茅花愈衄血

蔡子渥傳云同官無錫監酒趙無疵其兄衄血甚已死入殮血尚未止一道人過門聞其家哭詢問其由道人云是曾服丹或燒煉藥子有藥用之即活囊間出藥半錢匕吹入鼻中立止良久得活乃山梔子燒存性末之

本事方

又治鼻衄

不止欲絕者取茅花一大把剉碎用水兩椀煮
一椀分二服飲立止

方良

頭風

偏頭疼

裕陵傳王荆公偏頭疼方云是禁中祕方用生
萊菔汁一蜆殼仰卧注鼻中左痛注右右痛注
左或兩鼻皆注亦可數十年患皆二注而愈荆
公與僕言已愈數人矣

方良

頭眩

有人苦頭眩頭不得舉目不得視積年華佗使
悉解衣倒懸今頭去地三寸濡布拭身體今周
匠視諸脉盡出五色佗令弟子以鉞刀決脉五
色血盡視赤血出乃下以膏摩被覆汗出周匠
飲以葶藶散而愈

三國志

蹶頭熱

蓄川王病召臣意診脉曰蹶上爲頭重痛身熱
使人煩憊臣意即以寒水拊其頭刺足陽明左
右各三所病旋已病得之沐髮未乾而卧診如

前所以蹶頭熱至肩

史記

婦人偏頭痛

有一婦人患偏頭痛一邊鼻塞不聞香臭常流清涕或作臭氣一陣服遍治頭痛藥如芎蝎皆不效人無識此病者或曰腦癰偶有善醫云但服局方芎犀元不十數服忽作嚏涕突出一錠稠膿其疾遂愈

沐頭洗浴

沐頭不可用冷水必成頭風之疾浴罷不可和

衫裙寢恐成外腎腫疼腰背拳曲

婦人月水來不可沐頭

婦人女子月事之來不可洗頭或因感疾終身

爲癩疾不可治

泊宅編

川芎不可久服

一族子舊服芎藭醫鄭叔熊見之云芎藭不可

久服多令人暴死後族子果無疾而卒予姻家

朝士張子通妻因病腦風服芎藭甚久亦一旦

暴亡皆予目見者

筆談

眼疾

目疾

凡人食五辛接熱食飲刺頭出血過多極目遠
視燈前看字月下攻書不避煙火博奕經時飲
酒不已熱餐麵食抄寫多年雕鏤繡畫泣淚過
多房慾無節遠觀星火視日極目瞻望山川皆
是喪明之本可不謹哉

錄 瑣 碎

讀書損目

讀書之苦傷肝損目誠然晉范甯嘗苦目痛就

張湛求方湛戲之曰古方宋陽子少得其術以授魯東門伯次授左丘明遂世世相傳以及漢杜子夏晉左太冲凡此諸賢並有目疾得此方云用損讀書一減思慮二專內視三簡外觀四旦起晚五早夜眠六凡六物燹以神火下以氣篋蘊於胷中七日然後納諸方寸修之一時近能數其目睫遠視尺筭之餘長服不已洞見墻壁之外非但明目乃亦延年審如是而行之非可謂之嘲戲亦竒方也

本事方

觀音洗眼偈

台州僧處瑫中年病目常持誦大悲呪夢觀音
傳授法偈令每旦呪水七遍或四十九遍用以
洗眼凡積年障翳近患赤目無不獲痊處瑫跪
受而寤悉用記憶如說誦行之不踰時平愈壽
至八十八歲其偈曰救苦觀世音施我大安樂
賜我大方便滅我愚癡暗賢劫諸障礙無明諸
罪惡出我眼室中使我視物光我今說是偈洗
懺眼識罪普放淨光明願覩微妙相

志戊

眼疾不可洗浴

舊說眼疾不可浴浴則病甚至有失明者承直
郎白彥良云未壯歲之前歲歲患赤眼一道人
勸但能斷沐頭則不復病此彥良自此不沐今
七十餘更無眼病

泊宅編

眼痛不食

有人患赤眼腫痛脾胃虛弱喫飲食不得診其
肝脉盛脾脉弱涼藥以治肝則損脾愈喫飲食
不得服煖藥以益脾則肝愈盛而加病何以治

之但於溫平藥中倍加肉桂不得用茶調恐損脾也肉桂殺肝而益脾故一治而兩得之傳曰木得桂而死

醫餘

眼赤腫

有人患眼疾每睡起則眼赤腫良久却無事百方治之無效師曰此血熱也非肝病也卧則血歸於肝熱血歸肝故令眼赤腫也良久便無事者人睡起血復散於四肢故也遂用生地黃汁浸粳米半升摻乾曝令透骨乾凡三浸三乾用

萇瓶子煎湯一升令沸下地黃米四五匙煎成
薄粥湯放溫食半飽後飲一兩盞即睡如此兩
日遂愈生地黃汁涼血故也

同上

眼疾有虛實

凡眼疾有上盛下虛者有上虛下實者虛者宜
服補腎藥補其母也實者宜服涼心經藥瀉其
子也眼科云所謂補藥者非硫黃附子鹿茸菴
蓉之類是朱砂磁石之類也治眼而補下當用
眼藥故也茲爲至理

同上

赤目戒食

患赤目以熱水濯足佳若澡浴必致失明切不可食犬雞魚雞鴨卵

一目失明

錢鏐年老一目失明聞中朝國醫胡某者善醫上言求之晉祖遣醫泛海而往醫視其目曰尚父可無療此當延五七歲壽若決瘻去內障即復舊但慮損福爾鏐曰吾得不爲一目鬼於地下足矣願醫盡其術以療之當厚報醫爲治之

復故鏐大喜見賂醫金帛寶帶五萬緡具舟送
歸京師醫至鏐卒年八十一矣

劉穎叔
異苑

治眼

郭太尉真州人父患目盲有白翳膜遍喫眼藥
無能效者有親仲監稅在常州守官聞張翳龍
之名因薦於太尉太尉請張公視之曰此眼緣
熱藥過多乃生外障視物不明朝朝昏黑更無
所覩醫者皆爲肝元損下虛補其肝腎眼愈盲
甚張曰請太尉將藥點眼并服之一月取翳微

消後果一月翳退雙目如舊因求點喫藥方乃
只用猪膽微火銀銚內煎成膏入冰腦粒如黍
米大點入眼中微覺翳輕後又將猪膽白膜皮
曝乾合作小繩如釵大小燒作灰待冷點翳盛
者亦能治之此方甚好勿妄傳

名醫錄

治內障

熟地黃麥門冬車前子相雜治內障眼有效屢
試信然其法細搗蜜元桐子大三藥皆難搗羅
和合異常甘香真竒方也

東坡大全集

治爛緣眼

潭州宗室趙太尉家乳母苦爛緣風眼近二十
年有賣藥老媪過門云此眼有蟲其細如絲色
赤而長久則滋生不已吾能談笑除之入山取
藥晚下當爲治療趙使僕陰尾之見媪泐道掇
叢蔓木葉以手按碎送口中咀嚼而留汁滓於
小竹筒內俄復還索皂紗蒙乳母眼取筆畫雙
眸於紗上然後滴藥汁漬眼下緣轉盼間蟲從
紗中出其數十七狀如先所云數日再至下緣

肉乾如常人復用前法滴上緣又得蟲十數家
人大喜後傳與醫者上官彥誠遍呼鄰仄村婦
病此者驗試無不立差其藥乃覆盆子葉一味
著於本草陳藏器云治眼暗不見物冷淚浸淫
不止及青盲等取此草日曝乾擣令極爛薄綿
裹之以男子所飲乳汁浸如人行八九里又用
點目中即仰卧不過三四日視物如少年但禁
酒麵油蓋治眼妙品也

癸志

治內障眼

明州定海人徐道亨父沒奉母周游四方事之
盡孝淳熙中到泰州宿於逆旅因患赤眼而食
蟹遂成內障欲進路不能素解暗誦般若經出
丐市里所得錢米仍持歸養凡歷五年忽夜夢
一僧長眉大鼻托一鉢盂盂中有水令徐掬以
洗眼復告之曰汝此去當服羊肝元百日徐知
爲佛羅漢喜而拜願乞賜良方僧曰用淨洗夜
明沙一兩當歸一兩蟬殼一兩木賊去節一兩
共礮爲末買羊肝四兩水煮熟搗如泥入前藥

拌和元桐子大食後溫熱水下五十元服之百
日復舊與母還鄉母亡棄家入道

類說

治眼二百味花草膏

福州人病目兩臉間赤濕流淚或痛或痒晝不
能視物夜不可近燈光兀兀癡坐其友趙謙子
春語之曰是為爛緣血風我有一藥正治此名
曰二百味花草膏病者驚曰用藥品如是世上
方書所未有豈易遠辨君直相戲爾趙曰我適
見有藥當以與君明日携一錢七至堅凝成膏

使以匙抄小許入口一日淚止二日腫消三日
痛定豁然而愈乃往謁趙致謝且扣其名物笑
曰只用羯羊膽去其中脂而滿填好蜜拌均蒸
之候乾即入瓶研細爲膏以蜂採百花羊食百
草故隱其名以眩人云

癸志

班瘡入眼

小兒班瘡入眼皆由熱重毒氣上攻多因食毒
物所致若瘡子盛發時覺眼腫痛時時與開看
之睛上無瘡即不害事若有瘡亦須服清涼飲

子每日食後一服微利之瘡子乾後將攝不如法及飲食不謹或無故眼自痛者即毒氣不盡也輕者清涼飲重者雄黃解毒元須大下三四行然後服治眼藥只得睛不破無不愈者

保生方

眼中常見鏡子

有一少年眼中嘗見一小鏡子俾醫工趙卿診之與少年期來晨以魚鱸奉候少年及期赴之延於內且令從容俟客退方接俄而設臺子施一甌芥醋更無他味卿亦未出迨禺中又候不

至少年飢甚且聞醋香不免輕啜之逡巡又啜之覺胃中豁然眼花不見因竭甌啜之趙卿知之方出少年以啜醋慙謝卿曰郎君先因喫鱠太多醬醋不快又有魚鱗在胃中所以眼花適來所備醬醋只欲郎君因飢以啜之果愈此疾烹鮮之會乃權詐也

北瑣
夢言

目疾忌浴

有目疾者切忌浴令人目盲

遜齋
閑覽

偷針眼

凡患偷針眼者以布針一箇對井以目睛睨視之已而折爲兩段投井中眼即愈勿令人見

目視一物爲二

荀牧仲頃年常謂予曰有人視一物爲兩醫者作肝氣有餘故見一爲二教服補肝藥皆不驗此何疾也予曰孫真人云目之系上屬於腦後出於腦中邪中於頭因逢身之虛其入深則隨目系於腦入於腦則轉轉則目系急急則目眩以轉邪中於睛所中者不相比則睛散睛散則

歧故見兩物也今服驅風入腦藥得愈

本事方

洗眼湯

以當歸黃連芍藥等分用水濃煎汁乘熱洗冷則再溫洗甚益眼目但是風毒赤目花翳等皆可用之凡眼目之病皆緣血脉凝滯使然故以活血藥合黃連治之血得熱即行故乘熱洗之

用者無不神效

出本草黃連注

口齒喉舌耳

治喉閉

元公章少卿說開德府士人携僕入京其一忽
患喉閉脹滿氣塞不通命在頃刻詢諸郡人云
惟馬行街山水李家可看治即與之往李駭曰
證候危甚猶幸來此不然即死何疑乃於笥中
取一紙撚用火點着才煙起吹滅之令僕張口
刺於喉間俄吐出紫血半合即時氣寬能言及
啖粥飲搽藥傅之立愈士人甚神其伎後還鄉
里村落一庸醫偶傳得此術云咽喉病發於六
腑者如引手可探及刺破瘀血即已若發於五

臟則受毒牢深手法藥力難到惟用紙撚爲第一然不言所以用之之意後有人拾得其殘者蓋預以巴豆油塗紙故施火即着藉其毒氣徑

赴病處

類編

又

凡人患喉閉及纏喉風用藥開得咽喉後可以通得湯水急喫薄粥半碗或一碗壓下邪熱不壓即病再來不可不知也咽喉既可身熱頭疼不除此感外邪看脉氣及大小便有表證則發

汗有裏證則微下之皆愈愈後虛喘而身不熱者必是服涼藥過多而下虛也當服鎮重溫藥一服如黑錫元正一丹之類以粥壓之

咽喉腫痛

有人患咽喉腫痛下食不得身熱頭疼大便不通衆醫之論紛然皆以謂熱當服涼藥有一善醫云脉緊數是感寒氣所致衆醫不從善醫者曰我有法驗得寒熱浴室中生火用炒木葱湯淋浴若是病熱則此煖處必有汗而咽喉痛不

減若是感寒則雖浴無汗患信其言遂入浴淋
洗而無汗就浴室中服麻黃湯一服須臾大汗
出大便通即時無事衆醫服其神凡辯熱病與
感冷皆可用此法

醫餘

巧匠取喉鈎

咸平中職方魏公在潭州有數子弟皆幼因相
戲以一釣竿垂釣用棗作餌登陸釣雞雛一子
學之而誤吞其鈎至喉中急引乃鈎以鬚逆不
能出命之諸醫不敢措手魏公大怖令人遍問

老婦必能綿歷時有一老婦九十餘歲言亦未嘗見此切料有智識者可出之時本郡有一莫都料性甚巧今聞魏公魏公呼老婦責之曰吾子誤吞鈎莫都料何能出之老婦曰聞醫者意也其莫都料曾水中打碑塔添仰瓦魏公大咤親屬勉之曰試詢之公遂召莫都料至沉思時又言要得一蠶蠶及大念珠一弗公與之都料遂將蠶翦如錢大用物權四面令軟以油潤之仍中通一竅先穿上鈎線次穿數珠三五枚今

兒正坐開口漸添引數珠挨之到喉覺至繫鈎處乃以力向下一推其鈎以下而脫即向上急出之見蠶錢向下裹定鈎線鬚而出並無所損魏公大喜遂厚賂之公曰心明者意必大巧意明者心必善醫

名醫錄

舌腫滿口

一士人汧汭東歸夜泊村步其妻熟寐撼之問何事不荅又撼之妻驚起視之舌腫已滿口不能出聲急訪醫得一叟負囊而至用藥摻比曉

復舊問之乃蒲黃一味須真者佳

本事方

舌無故血出

一士人無故舌出血仍有小穴醫者不曉何疾
偶曰此名衄炒槐花為末摻之而愈

良方

牙疼

牙疼有四一曰熱二曰冷三曰風四曰虫熱者
怕冷水冷者怕熱湯不怕冷熱即是風牙有虫
竅者即是虫牙用藥之法熱用牙硝鬱金雄黃
荊芥之類冷用乾薑華撥細辛之類風用猪牙

皂角彊蠶蜂房川草烏之類
蚰用雄黃石灰砂糖之類
熱牙宜於牙齦上出血腫
牙痛用藥畢皆以溫湯漱之

醫餘

牙齒日長

牙齒逐日長漸漸脹開口難為飲食蓋髓溢所致只服白朮愈

衛生十全方

舌脹出口

有人舌腫脹舒出口外無敢醫者一村人云偶有此藥歸而取至乃二紙撚以燈燒之取煙薰

舌隨即消縮衆問之方肯言吾家舊有一牛亦
舌腫脹出口人教以革麻取油蘸紙撚燒煙薰
之而愈因以治人亦驗

治齒痛

葉景夏家一妾爲病齒所苦遇痛作時爬床刮
席叫呼連夕徹旦勺飲不可入口醫者無所不
用經年不差或授一方取附子尖天雄尖全蝎
七箇皆生碾碎拌和以紙撚蘸少許點痛處隨
手則止林元禮云是未足爲竒舊得一法捕蚶

蛟大者一枚削竹篋子刮其眉即有汁粘其上
約所取已甚則放之而以汁點痛處凡疔蝕癰
腫一切齒痛悉可用藥到痛定仍不復作姪孫
僦云此名蟾酥膏先以篋掠眉下汁未出時當
以細杖鞭其背及頭候作怒鼓脹則流注如涌
然後挹以綿徑窒痛處

類編

齩齒

齊中大夫病齩齒淳于意灸其左太陽脉即爲
苦參湯日漱三升出入五六日病已得之風及

卧開口食而不漱

史記

飲酒漱口

劉几年七十餘精神不衰每一飲酒輒一漱口雖醉不忘也曰此可以無齒疾晡後食少許物

便已

明道雜誌

漱口食冷

進士劉遁異遇人曰世人奉養往往倒置早漱口不若將卧而漱去齒間所積牙亦堅固今人食冷物必飲湯將温其脾已冰其脾又何温之

有不若未食冷物先飲湯温之繼食冷即無患

也翰苑名談

棗能黃齒

倪彥及朝奉嘗為太原府幕官云彼中人喜食棗無貴賤老少常置棗於懷袖間等閑採取食之郡人之齒多黃緣食棗故嵇叔夜所謂齒居晉而黃風處頭而黑是也

遜齋開覽

齒藥

西嶽蓮華峯碑載治口齒烏髭藥歌猪牙皂角

及生薑西國升麻蜀地黃木律旱蓮槐角子細

辛荷葉翦荷葉心子也要相當青鹽等分同燒煨研熟

將來使更良措齒牢牙髭鬚黑誰知世上有仙

方類苑

齒間肉壅出

汪丞相徽之祈門人有寵平日好食動風物性

尤嗜蟹或作蟹包蟹簽恣噉之一日得風熱之

疾齒間壅一肉出漸大漲塞口不能閉水漿不

入痛楚待盡而已有一道人言能治此疾丞相

命醫之不日而愈其法用生地黄取汁一碗豬
牙皂角數銚火上灸令熟蘸汁令盡末之傅瘡
肉上隨則消縮後多金與之得此方

其婿李大夫說

飲酒喉舌生瘡

連月飲酒咽喉爛舌生瘡水中螺蚌肉葱豉薑

椒煮汁飲三盞差

聖惠方

苦參不可潔齒

予嘗苦腰重久坐則旅拒十餘步然後能行有
一將佐見予曰得無用苦參潔齒否予時以病

齒用苦參數年矣曰此病由也苦參入齒其氣傷腎能使人腰重後有太常少卿舒昭亮用苦參揩齒歲久亦病腰自後悉不用腰疼皆愈此皆方書舊不載者

筆談

齒縫出血

齒縫出血不止他藥不能治者鹽主之素問云

鹽勝血故也

蘭室寶鑑

用麥門冬煎湯漱之亦良

虎鬚治齒痛

虎鬚治齒痛仙人鄭思遠常騎虎故人許隱齒

痛求治鄭曰虎鬚及熱插齒間即愈拔數莖與

之

積年耳聾

驢生脂和生薑熟搗綿裹塞耳治積年耳聾

本草

按本草乃生椒非薑第未試用

骨哽

韻略用 骸字

治哽以類推

凡治哽之法皆以類推鷓鴣治魚哽磁石治針
哽髮灰治髮哽狸虎治骨哽亦各從其類也

鵬砂治哽

鄱陽汪友良因食辣蹄誤吞一骨如小指大哽於咽喉間隱然見於膚革引手可揣摩百計不下凡累日雖咳嗽亦痛僅能略通湯飲家人絕憂之於昏睡次覩一人着朱衣來告曰聞汝爲骨所苦吾有一藥唯南鵬砂最妙恍惚驚寤謂非夢也殆神明陰受以方欲全其命索藥笥得砂小塊汲水滌洗取而含化才食頃脫然而失

呪水治哽

以淨器盛新汲水一盞捧之面東默念云謹請
太上東流順水急急如南方火帝律令敕一氣
念七遍即吹一口氣入水中如此七吹以水飲
患人立下或用此呪水可以食針并竹刺

百一
選方

漁人治哽

蘇州吳江縣浦村王順富家人因食鱖魚被哽
骨橫在胃中不上不下痛聲動鄰里半月餘飲
食不得幾死忽遇漁人張九言你取橄欖與食

即軟也適此春夏之時無此物張九云若無尋
橄欖核搗爲末以急流水調服之果安問張九
你何緣知橄欖治哽張九曰我等父老傳橄欖
木作取魚掉篋魚若觸着即便浮被人捉却所
以知魚怕橄欖也今人煮河豚須用橄欖乃知
化魚毒也

名醫錄

治哽

滁州蔣教授名南金因食鯉魚玉蟬羹爲肋骨
所哽凡治哽藥及象牙屑用之皆不效或令以

貫衆不以多少濃煎汁一盞半分三服併進連服三劑至夜一咯而出因戲云此管仲之力也

百一
選方

故魚網治哽

故魚網主哽以網覆哽者頸差如煮汁飲之骨

當下矣

本
草

倉卒有智

秀州士大夫家一小兒五歲因戲劇以首入搗藥臼中不復出舉家驚呼無計或教之使執兒

兩足以新汲水急澆之兒驚啼體縮遂得出又
有小兒觀打稻取穀芒寘口中黏著喉舌間不
可脫或令以鵝涎灌之即下蓋鵝涎能化穀也
二者皆一時甚急非倉卒有智未易脫

夷堅志

喘嗽

喘有三證

凡人患喘其證有三一曰寒二曰熱三曰水病
熱者發於夏而不發於冬冷病者遇寒則發也
水病者胸膈滿悶脚先腫也熱病者宜蛤蚧元

冷病宜煮肺散水病審其冷熱虛實虛而冷者
紫金丹熱而實者防已元此出養生必用方不
合防已元但言腹有濕熱欲驗喘疾是水不是
水者小便澀脚微腫而喘者水證也當作水治
之小便不澀脚不腫只作喘治之沈存中良方
蒲葎葉孫大資麻黃梓朴湯不拘冷熱皆可服
也

咳嗽

咳嗽有二一曰熱二曰寒熱嗽有痰濃鼻聞腥

氣宜服涼藥寒嗽痰薄宜服熱藥飲冷水一二
呷而暫止者熱嗽也呷熱湯而暫止者冷嗽也
此法用之有驗以小柴胡湯治熱嗽以理中湯
加五味子治寒嗽皆已試之驗醫餘
同上

又

經曰人感於寒則受病微則爲咳甚爲泄爲痛
凡咳嗽五臟六腑皆有之惟肺先受邪蓋肺主
氣合於皮毛邪之初傷先客皮毛故咳爲肺病
五臟則各以治時受邪六腑則又爲五臟所移

古人言肺病難愈而喜卒死者肺爲驕臟怕寒而惡熱故邪氣易傷而難治以其湯散徑過針灸不及故也十種咳嗽者肺咳心咳脾咳腎咳肝咳風咳寒咳支飲咳膽咳厥陰咳華佗所謂五嗽者冷嗽氣嗽鱗嗽飲嗽邪嗽孫真人亦有方治寒毒症嗽者歷代方論著之甚詳惟今之所謂勞嗽者無所經見意其華佗所謂邪嗽真人所謂症嗽者是也此病蓋酒色過度勞極傷肺損動經絡其重咯唾膿血輕者時發時差又

有因虛感邪惡之氣且傳疰得之或先嘔血而後嗽或先咳嗽漸就沉羸此則非特內損肺經又挾邪惡傳疰之氣所以特甚病之毒害無過此也真人治疰嗽通氣丸方用蜈蚣四節又云夢與鬼交通及飲食者全用蜈蚣外臺方四滿丸治五嗽亦用蜈蚣近世名公能推原其指意率用蛤蚧天靈蓋桃柳枝麝香丹砂雄黃安息香之類以通神明之藥療之高出古人之意又肺中有蟲如蠶令人喉痒而咳湯散徑過針灸

不及以藥含化蟲死即嗽止

雞峯方

治痰嗽

綬帶李防禦京師人初爲入內醫官直嬪御閣妃苦痰嗽終夕不寐面浮如盤時方有甚寵

徽宗幸其閣見之以爲慮馳遣呼李李先數用藥詔令往內東門供狀若三日不效當誅李憂撓伎窮與妻對泣忽聞外間叫云咳嗽藥一文一貼喫了今夜得睡李使人市藥十貼其色淺碧用淡蘆水滴麻油數點調服李疑草藥性獷

或使臟腑滑泄併三爲一自試之旣而無他於是取三貼合爲一携入禁庭授妃請分兩服以餌是夕嗽止比曉面腫亦消內侍走白天顏絕喜錫金帛厥直萬緡李雖幸其安而念必宣索方書何辭以對殆亦死爾命僕俟前賣藥人過邀入坐飲以巨鍾語之曰我見鄰里服汝藥多效意欲得方儻以傳我此諸物爲銀百兩皆以相贈不吝曰一文藥安得其直如此防禦要得方當便奉告只蚌粉一物新瓦炒令通紅拌

青黛少許爾扣其所從來曰壯而從軍老而停
汰頃見主帥有此故剽得之以其易辦姑藉以
度餘生無他長也李給之終身

類編

治齁喘

信州老兵女三歲因食鹽鯁過多遂得齁喘之
疾乳食不進貧無可召醫一道人過門見病女
喘不止教使求甜瓜蒂七枚研為麤末用冷水
半茶鍾許調澄取清汁呷一小呷如其說才飲
竟即吐痰涎若膠藕狀胸次既寬齁喘亦定少

日再作又服之隨手愈凡三進藥病根如掃此藥味極苦難吞嚥俗諺所謂甘瓜蒂苦非虛言也

同上

喘病

李翰林天台人有莫生患喘病求醫李云病日久矣我與治之乃取青橘皮一片展開入江子一箇將麻線繫定火上燒烟盡留性爲末生薑汁酒一大鍾呷之過口便定實神方也

名醫錄

肺氣

肺者臟之蓋也肺氣盛則脉大脉大則不得偃卧

肺熱久嗽

有婦人患肺熱久嗽身如炙肌瘦將成肺勞以枇杷葉木通欵冬紫苑杏仁桑白皮等分大黃減半如常製為末蜜丸櫻桃大一丸食後夜卧含化未終劑而愈

本草衍義

喘有冷熱

人有喘疾不可一槩治之須分陰陽病發於冬

寒冷病也病發於暑月熱病也冷病服豉霜丸
清中湯煮肺散熱病服青杏蛤蚧丸之類又有
一方孫大資梓朴散不拘冷熱皆可服

醫餘

水喘

有人先因咳嗽發喘胸膈痞悶難於倒頭氣上
湊者宜早利水道化痰下氣若不早治必成水
宜服紫金丹病水入膜外切不可鍼鍼透
膜初時稍愈再來即不可治

同上

翻胃

治翻胃

淳熙元年冬檇姪自鄱陽往四明過婺州義烏
晚泊逆旅脩有野服者坐予傍扣其何人曰邑
醫孫道攻療眼疾檇與之語孫曰君貴家子弟
必藏好方畀我一二或可爲人起疾檇素秘翻
胃方卽口授之其法用一大附去其蓋剗中使
淨納丁香四十九粒復以蓋覆之用線縛定寘
銀石器中浸以生薑自然汁及蓋而止慢火煮
乾細末一錢七摻舌上漱津下若煩渴則徐食

糜粥忌油膩生冷孫喜書之於冊未幾州鈴轄
苦此病危甚孫爲拯之正用此方數服愈

類編

驢尿治翻胃

驢尿治翻胃外臺載昔幼年經患此疾每食餅
及羹粥等須臾吐出正觀中許奉御兄弟及柴
蔣等時稱名醫奉敕令治罄竭其術竟不能療
漸至羸憊死在朝夕忽有一衛士云服驢小便
極驗日服二合後食唯吐一半晡時又服二合
人定時食粥吐即便定迄至今日午時奏之大

內五六人患翻胃同服一時俱差此藥稍有毒
服時不可過多盛取及熱服二合病深七日以
來服之良驗

本事方

乾嘔不吐

粥食湯藥皆吐不停灸手間使二十壯若四肢
厥脉沉絕不至者灸之便通此起死之法

千金方

霍亂

夫霍亂之起皆由起居之失宜飲食之不節露
卧濕地或當風取快溫涼不調清濁相犯風冷

之氣歸於三焦傳於脾胃真邪相干水穀不化
便致吐利皆名霍亂其揮霍之間便致撩亂診
其脉來代者霍亂又脉代而絕者是證也霍亂
脉大者可治微細者不可治脉微而遲氣息少
不欲言者不可治養生方云七月食蜜令人暴

下雞峯方

醫說

防中